



kazkezur

gazte kazeta

2008ko abendua / 0. zenbakia / debalde

sentitu,
pentsatu
eta ekin!

konpromiso
hitzarmena?



Nik banekien

Hori da sekretua gordetzen jakitea. Ondo oriotarak izan ginen horretan ere. *“Hau konfiantzan: irailaren azken ostiralean sartuko gaituk; gero, jabearekin eta zinegotziekin hitz egingo diagu”*. Zein da begiz jo duzuen lokala? Zein da jabea? Zer dago, herriaren erdi-aldean? Handia al da? WiFia harrapatzen al da bertatik? *“Diskrezioa behar diagu; gazte festetan argituko duk dena”*.

Nik Kontxako lehen igandean jakin nuen. Nola esan duk? Kolpean,

erregeak gurasoak direla jakitean izaten den sentsazioa berreskuratu nuen. Neroni izan nintzen jakiten ia azkena. Ordu-rako plenotik pasea zegoen gaia, arartekoa bera ere lokala ikusten izan omen zen herrian eta furgonetan denak kabitzen ez eta traste zaharrez josia zegoen kosta tailer-raren atzeko alde.

Bitartean, marmarra kallean. Iritzien errota martxan, batzuk ilusioz, denak purrustan eta geldirik. *“Betiko gaiak landuko dira: feminismoa, ekologia,*

etxebizitza arazoa... gaztetxean amaituko ote dugu mundua konpontzen? Koadrila bakar-raren bilgune izaten amaituko du. Zikina izango da, kaleko kartelak txukun egiten ere ez dute eta ikasi. Beti antzeko musika; pankarta politikoak ikusiko ditugu. Jaietan tabernak itxi eta nora joan badugu behin-tzat! Halere, aldeko zerbait entzun dugunean. Eman aukera bat herrian lanean ari direnei.

Zer da lehenagokoa, beharrezkoagoa, proiektua edo eraikina? Fundamentuzko gazte asanblada edo eraikina? Hasiera-hasieratik, gauza bakarra da gustatzen ez zaidana: OKK, Orio Kaka. Izen berria behar dugu.

Torrotxo

lehiaketa

Gaztetxearentzat izen bat eta/edo logo bat sortu eta bidali ezazu kazkezur@hotmail.com helbidera edo eraman asanbladara abenduaren 31 baino lehen. OKKko kamiseta bat irabaz dezakezu.

hileko esaldia:

**bi kontzeptu infinitu
bakarrik ezagutzen ditut:
unibertsoa eta giza inozokeria.**

-albert einstein-



Zein ondo pasa genuen gazte festetan. Irailaren azken aste-buruarekin batera, hiru eguneko jaia ospatu genuen gaztetxearen beharra aldarrikatzeko. Ez, ez genuen gaztetxerik okupatu, baina herria geure egin genuen. Unerik onenak ekarriko ditugu gogora kronika labur honetan.

gazte festak 08

Okupazio eguna klabe izan zen gazteon etorkizunerako, gaztetxea sortzeko negoziaketetan hasi baikinen Udal ordezkariekin, eta oraindik ere horretan dihardugu. Txupinazoa bota ondoren, ederra izan zen gaztetxe aurrean montatu genuena. Harrietek mitin hunkigarria egin zuen; kaskagorriak begira zituela, gainera.

Inoiz egin dugun herri bazkari jendetsuena egin genuen larunbatean. Ez ziren gazte asko bertan falta zirenak. 200 pertsonatik gora, nahi adina marmitako jan genuen, eta, postrerako, Gaztelumendiren eta Gurrutxagaren bertsoak. Aiarrek ere montatu zuten zirkoa.

Herri kirolentzat tartea ere izan genuen igandean. Gazte txarangarekin goiko kalea zeharkatu ondoren, hamaike-

takoarekin batera, kirol saio lehiatua izan genuen.

Hala ere, gazte festetako une ahaztezinetako bat arratsaldeko baltsa karrera izan zen. Koadrilen eguna izanik, baltsa mordoa eraiki zuten koadrilek lasterketarako, baina batzuk ez zuten pate hartzeko zorterik izan. Dirudenez, ez gara oso brikomaniakoak, eta espero genuena baino jende gehiagok ibili behar izan zuen igerian.

Kontzertu bikainak ere izan genituen: herriko taldeak (Can't explain, Kenon, Orio Konbakt Rock, Mikel Aranzabal eta Dj Illarras), Darling Shoes, Aurka eta Mahaster River. Momentuan izan genituen arazoengatik Triki Ta Kek ezin izan zuen bere emanaldia eskaini; lastima, baina gaztetxean izango ditugu.

Asko hitz egin da gaztetxeaz azken aldian, baina orain arte ezin izan dugu informazio garbirik eman. Jarraian duzuen testu hau, azaroaren 28an Udalarari aurkeztutako hitzarmena da. Abenduaren 1ean aztertu zen OKK eta Udal ordezkarien artean. EAJk eta PSE-EEK lekua zehaztu bitartean ez dutela sinatuko adierazi dute. Gainontzekoak prest agertu dira.



Hitzarmen honen bidez, Orioko Udalak eta OKK Gazte Asanbladak elkarren arteko konpromisoa hartzen dute herrian gaztetxea sortu dadin, Orioko hirigunean bertan (poligono industrialetan, ez), eta ondorengo leku aukerak aztertuz, lehen-tasun hurrenkera honetan:

1. Etxeluzia eraikina: Eraikin hau da OKK Gazte Asanbladak gaztetxe modura aukeratu zuena. Etxejabearen, OKK Gazte Asanbladaren eta Udaleko ordezkarien artean (EAJ izan ezik beste guztiak) hitzezko aurreadostasun bat dago eta betetzen saiatu behar da. Eraikinean egin beharreko lanen kostua jaisteko, OKK Gazte Asanbladak egin ditzake aurrekontuan agertzen diren lan asko. Beraz, aukera hau jorratzen jarraitu behar da.

2. Kosta Tailerra: Bai Udalak eta baita OKK Gazte Asanbladak ere sarritan aipatu izan dute eraikin hori egoki ikusten dutela gaztetxea bertan sortzeko. Aukera hau bi aldeek ontzat ikusten badute, une honetan Kosta Tailerrean dauden talde eta eragileei irtenbide duin bat aurkitu beharko zaie, beren eguneroko ekintzak egiten jarraitzeko arazorik izango ez dutela bermatuz.

3. Beste eraikin bat: 1. eta 2. puntuetan

aipatzen diren aukerak ezin badira aurrera atera, beste eraikin bat bilatzen hasiko lirateke Udala eta Gazte Asanblada, eraikinaren egokitzapenaren kostua Etxeluziarena baino merkeagoa izateko asmoz. Beste eraikin honen alokairua 1000 euro baino garestiagoa bada, Udalak ordainduko du aldea. Eraikin hori aukeratzeko unean, herriko gazteen aisialdirako behar guztiak asetzeko adinako azalera izango duela bermatu beharko da.

Atal hau onartuta, ondorengo konpromiso hauek hartzen dituzte Orioko Udalak eta OKK Gazte Asanbladak:

OKK GAZTE ASANBLADAK:

OKK Gazte Asanbladak, sarrerako atala onartu eta herriarentzat Udalarari diru laguntzarik eskatu gabeko ekintzak egiteko konpromisua hartzeaz gain, hitzarmen hau sinatzen den egunetik hasita (abenduaren 1a) 2 hila-beteren barruan (otsailaren 1a baino lehenago) behin behineko gaztetxea sortzeko konpromisoa hartzen du, ondorengo baldintzak betez:

- OKK Gazte Asanbladak beste eragileei informatu eta Gaztetxe Asan-



blada sortzeko konpromisoa hartzen du, Gaztetxe Asanblada horrek ondorengo baldintzak bete ditzan gaztetxearen funtzionamenduaren arduradun modura.

- Gaztetxea herritar eta kanpotar guztiei irekia izatea bermatuko da; sexu, arraza, nazionalitate, hizkuntza... bereizketarik gabe.

- Alokairu kosturik izango balitz, lehen 12 hilabeteetan, Gaztetxe Asanbladak, gehienez, gainerako kostuaren herena ordainduko du (BEZa kenduta).

- 13. hilabetetik kontratuaren amaiera arte, Gaztetxe Asanbladak, gehienez, gainerako kostuaren erdia ordainduko du (BEZa kenduta).

- Etxeluzia ez den beste eraikin batean egingo balitz gaztetxea, eta alokairuaren kostua (BEZ barne) 1.000 euro baino garestiagoa izango balitz, Gaztetxe Asanbladak ez du bere gain hartuko diru kostuaren aldea.

- Gaztetxe Asanbladak bulego teknikoak eska ditzakeen ezinbesteko segurtasun baldintzak onartuko ditu, gutxienezko segurtasun eta higiene baldintzak bete daitezen gaztetxean.

- Gaztetxe Asanbladak erabateko burujabetzaz autogestioa jorratzeko konpromisoa hartzen du Udalari bertako martxa jarraitzeko eskubide osoa emanaz, begirale baten bitartez; baina inola ere aukerarik izan gabe bertan hartzen diren erabaki edo ekintzetan eskua sartzeko. Udalak gaztetxean ekintzaren bat antolatu nahi izanez gero, Gaztetxe Asanbladari eskatu beharko dio baimena.

- Kontratuaren iraupena agintealdia amaitu artekoa izango da, gaztetxea beharrezkoa dela frogatzeko. Agintealdia amaitzean, beste 4 urtez berrituko litzateke kontratua, Udalak, Gaztetxe Asanbladak eta eraikinaren jabeak (izango balitz) hala nahi izanez gero.

- Aipatutako bigarren kontratuak irauten duen bitartean, Gaztetxe Asanbladaren eta Udalaren artean behin betiko irtenbide bat adostu beharko da behin betiko gaztetxe finko bat sortzeko. Behin betiko gaztetxea sortzean, OKK Gazte Asanbladaren konpromisoa herriarekiko bakkirik izango da, eta ez Udalarekiko konpromiso ekonomikoa.

ORIOKO UDALAK:

Orioko Udalak, sarrerako atala onartu eta OKK Gazte Asanbladak egingo dituen ekintzak egiteko erraztasunak emateaz gain, hitzarmen hau sinatzen den egunetik hasita (abenduen 1a) bi hilabete epearen barruan (otsailaren 1a baino lehenago) behin behineko gaztetxea sortzeko konpromisoa hartzen du, ondorengo baldintzak betez:

- Alokairu kosturik izango balitz, lehen 12 hilabeteetan, Udalak, gutxienez, BEZa eta gainerako kostuaren bi heren ordainduko ditu.

- 13. hilabetetik kontratuaren amaiera arte, Udalak, gutxienez, BEZa eta gainerako kostuaren erdia ordainduko du.

- Etxeluzia ez den beste eraikin batean egingo balitz gaztetxea, eta alokairuaren kostua (BEZ barne) 1.000 euro baino garestiagoa izango balitz, Udalak bere gain hartuko du diru kostu-aren aldea.

- Ur beroaren, argi indarraren eta komunen instalazioa, aseguruaren kontratazioa eta bulego teknikoak eska ditzakeen ezinbesteko segurtasun baldintzak Udalak bere gain hartuko ditu, gutxieneko segurtasun eta higiene baldintzak bete daitezzen gaztetxean.

- Udalak gaztetxea herriko gune publiko modura onartuko du.

- Udalak Gaztetxe Asanbladaren erabateko burujabetza onartzea autogestioa egin ahal izateko. Honek esan nahi du Udalak bertako martxa jarraitzeko eskubide osoa izango duela, begirale baten bitartez; baina inola ere ez duela izango bertan hartzen diren erabaki edo ekintzetan eskua sartzeko aukera. Udalak gaztetxean ekintzaren bat antolatu nahi izanez gero, Gaztetxe Asanbladari eskatu beharko dio baime-na.

- Kontratuaren iraupena agintealdia amaitu artekoa izango da, gaztetxea beharrezkoa dela frogatzeko. Agintealdia amaitzean, beste lau urtez berrituko litzateke kontratua, Udalak, Gaztetxe Asanbladak eta eraikinaren jabeak (izango balitz) hala nahi izanez gero.

- Aipatutako bigarren kontratuak irauten duen bitartean, Gaztetxe Asanbladaren eta Udalaren artean behin betiko irtenbide bat adostu beharko da, behin betiko gaztetxe finko bat sortzeko. Behin betiko gaztetxea sortzean, Udalak OKK Gazte Asanbladaren konpromisoa herri-arekiko bakarrik izango dela onartzen du, eta ez Udalarekiko konpromiso ekonomikoa.

Zer da gaztetxea?

Gaztetxea mugarik gabeko espazioa da, kultura eta ekintza sozialak sustatzeko leku askea, non gazteok autogestioaz, autofinantzazioaz eta esperientzia propioez, gure izaera definitu eta garatzeko aukera izango dugun. Gazteon aisialdia, kontzertu, antzerki, hitzaldi, ikastaro eta abar luze batez asetzeko lekua. Ditugun arazo eta beharrei erantzuteko aukera emango digun etxea. Denon etxea, herritar eta kanpotar guztiei irekia. Elkarrekiko errespetua eta elkarlana izango dira bertan praktikan jarriko diren arau nagusiak.

Norbaitek pentsa edo esan dezake, hau utopia soil bat besterik ez dela, baina Euskal Herriko hainbat herritan frogatu dute, errealitate bihurtzeko, gogoia besterik ez dela behar. Eta horixe da guk gehien daukaguna. Urrutira joan gabe, Zarautz, Usurbil, Getaria, Zumaia, Zestoa, Deba, Mutriku, Azpeitia, Azkoitia, Tolosa, Ibarra, Urretxu, Ordizia, Beasain eta beste herri askok sortu dute dagoeneko gaztetxea, eta Oriok ezin du atzean gelditu.

OKK Gazte Asanblada



Adi gazteak, sanikolasak badatoz. Iaz bezala, festa herrikoien aldeko apustua egingo dugu, eta horretarako, denon parte hartzea beharrezkoa da. Taberna zulotik ateratzeko egitarau ederra antolatu dugu gazteontzat. Anima zaitetzte!

PIRATEN TANBORRADA

Sanikolas bezperatik hasiko gara giroa berotzen. Urte osoan egin dugun lan gogorrari azken puntua jartzeko, herriko gazte ugari, txupinazoan, danborrak astinduko ditugu. Nola ez, gure betiko umore kutsuaz blai egingo dugu herria, pirataz jantzi eta tanborradako nahiz inauterietako abesti dantzagarriak joz. Parte hartu ezin dutenak ere datoze-la pirataz jantzita. Zergatik ez?

GAUPASA EGUNA (abendua 7)

Normalean baino beranduago hasiko dugu eguna, batzuentzat oraindik larunbata izango den arren. 09:30ean irtengo da gazte txaranga plazatik. Herria esnatu eta egunari gogoz heltzeko, lehen poteoa egingo dugu. Behin begiak irekita,

hamaiketako egingo dugu, herriko zaharren kontra tokan eta igel jokoan jardun bitartean. Zahar eta gazteei egin beharko *anti-doppinga*. Ondoren, 12:30ean, koadrilen arteko paella lehiaketa. Sukaldean ari diren bitartean, Joseba Urbietak, betiko euskal kantuak abestuko ditu, bere gitarraren laguntzaz. Jateko ordua iritsita, 14:00etan hasiko gara paellak jaten, jangarri badaude behintzat, eta segidan karta jokoan arituko gara (puntuak, txintxonak, kakaxainen...). Sari banaketa ere orduan egingo dugu. 18:00etan, kale antzerki-az goatzeko beta izango da Alproja taldearekin, eta gazte txarangarekin arratsaldeko poteoari ekingo diogu ondoren. Gaua ongi hasteko, Can't explain, Sixty Sexer eta Esne Beltza.

abenduko agenda

	<p>(3) Euskararen eguna: Kazkezur gazte kazetaren 0. zenbakia kalean</p>		<p>(5) Sanikolas bezpera. Jantzi pirataz</p>	<p>(6) Sanikolas eguna</p>	<p>(7) Gaupasa eguna. 09:30-...</p>
<p>(8) Euskal Jaia</p>			<p>(13) The International Noise Conspiracy. 21:30. Bilboko kafe antzokian. 18-22 €</p>		
<p>(2, 4, 9, 11, 16, 18, 23, 30) OKKko asanbladak 19:00etan Kosta Tailerrean</p>		<p>(13) Putzuzuloko 2. artista topaketa 17:00etan</p>		<p>(21) Santo Tomas</p>	
	<p>(24) Gabon gaua. Baserritarrez jantzi eta kantu eskean irtengo gara</p>	<p>(25) Eguberria</p> 	<p>(28) Inuxente eguna</p>		
<p>(31) Urtezahar gaua</p>		<p>Urte berri on!</p>			



**Birziklagarria naiz.
Bota nazazu
edukiontzi urdinera.**

kazkezur
gazte kazeta
Kultur Etxea
20810 Orio
kazkezur@hotmail.com
Editorea:
OKK
Mila esker KARKARari
edizio materiala uzteagatik.